

Landesbibliothek Oldenburg

Digitalisierung von Drucken

Jahrbuch für das Oldenburger Münsterland

Vechta, Oldb, 1969-

Helga Hürkamp: Forsken

urn:nbn:de:gbv:45:1-5285

Helga Hürkamp

Forsken

Wi könt Natur
uttehren, plattmaoken,
Barge versetten,
dat Weltenall
krüüz un dwesk
vernetzen.

Atome upklöven,
Raketen stüür 'n
Mond un Sterne
beschnüffeln,
Chemie insetten,
tau 'n Wohl
un Verdarv.

Wi könt Mensken
dörlöchten,
utnännernehmen,
tausaomenflicken,
Lievdeile verplanten,
künstlick bestücken.

In Reagenzglöser
Leven tüügen
längere Tied iniesen,
löterhen verplanten,
de Gene manipulieren.

Forsken,
wo fang 't an -
wo hört 't up -
sünd wi
amenn' at Luzifer,
de sik
kläuker dünkde
at Gott?

Jutta Engbers

Maol eben anpingeln

„Düdeldeldüüüü“ - „Jao, ... ick sit in’n Zug, bin glieks in Hude. Holst mi af? Wunnerbar ... bit denn.“ Sascha klappte sien Handy - sien bestet Telefon tau’n Mitnehmen - tauhoppe un leggde et up den Disch för sik. Denn fummelde he dat End van sien Musikspeeler för unnerwegens weer in sien rechtet Ohr, nöhm sik den lüttken Reckner in de Hand un speelde wieder.

„Düdeldeldüüüü“ rappelde dat Handy för em weer un blinkerte blau up. Alle Lüe ründumtau keken up, de een of annere fummelde in siene Büksentaschke, man Sascha tövde noch een beten, trück den Knop ut sien rechtet Ohr un leggde den häni’gen Reckner up den Disch bit he dat Handy weer open mök: „Jao! ... Cool, klaor komm ick, ... so in teihn Minuten. Ick kaom naoh achten rut. ... Bit denn.“

Ditmaol klappte he dat Telefon nich tau, man he löt siene Fingers up un daol danzen. Een einfach piep un veel geelrot up de lüttke Schiebe melde em, de korte Naohricht was weggaohn. Nu erst füng he sien Aflop weer an, Handy tauklappen, up den Disch leggen, den Knop in ‘t rechte Ohr stoppen ... He was noch nich klaor, as eene Stimm ut den Luutspreker bölkte: „Wi kommt glieks in Ollenborg in Ollenborg an, de Zug blift hier, stiegt se man alle ut.“

Sascha annerde sien’n Trott un reet den övergrooten schwarten Büdel ut den Korp over sienen Kopp. De Stripp van sien’n Musikspeeler köm darin faste, de lünke Knop füllt ut sien Ohr, dat helle Ding up de Grund. He wullde et upnehmen, de hännige Reckner wörd van den Disch fegt un klabasterte in den Gang tüsken de Feute van drei annere Soldaten up den Weg nao Hus in ‘t Wäkenenne. De een griende wiet, de in greun Tüch krech den Reckner up un gev em Sascha in de Hand. Sascha nickoppde, man sien Kopp farvte sik noch een beten deeper rot, as de Darde mit den graoten greunen Büdel up de Schuller meende: „Tauveel Speeltüch is nich gaut för lüttke Kinner.“

Bit he ut den Zug rut was, köm he reell in Schweit un hopde blots, dat siene Mamme em nich up den Perong afholle de, man as afmaokt achtern an ‘n Utgang in ‘t Auto tövde.